



TERZA SESSIONE URDINARIA DI U
2025
RIUNIONE DI I 26 E 27 DI GHJUGNU
DI 2025

3EME SESSION ORDINAIRE DE 2025
REUNION DES 26 ET 27 JUIN 2025

2025 / E3/037

**REPONSE DE MONSIEUR GILLES SIMEONI A LA QUESTION DEPOSEE PAR MADAME
VERONIQUE PIETRI AU NOM DU GROUPE CORE IN FRONTE**

Objet : Di pettu à i culunialisti, ùn hè tempu ch' à Cullettività si move pà a lingua corsa ?

Vi ringraziau per a vostra quistione.

Seraghju cortu, ch' emu da avè un dibattitu dedicatu dopu meziornu.

Pensu ch' a situazione hè attempu grave, ma porta dinù risposte, è spergu ch' ella purterà risposte ch' jare à livellu ghjuridicu, custituziunale è di l' insegnamentu di u corsu.

Possu scumparte parechje di e vostre rimarche è inchietudine ; ùn sò micca tutt' à fattu d' accordu, a vi pensate, nantu à a presentazione generale , ma ùn ci turnaraghju micca. Dipoi 2021 emu fattu di più ch' è ciò ch' aviamu fattu trà 2015 è 2021,

Ma di sicuru ch' ùn basta micca. U custatu, è quessa hè u più impurtante, puru cù i nostri sforzi è a nostra vulintà attuale, u quattru generale, ch' ellu sia à u livellu ghjuridicu o ind' u sistema educativu, o ind' a sucetà, u quattru generale ùn

guarantisce micca a tramandera è l'usu di a lingua per istituisce a nostra lingua à a so piazza naturale ind'a sucetà corsa. Ghjunghjimu dinù à un stadu induve a nostra strategia, mi pare, porta unipochi di frutti, puru per sottulineà e mancanze di u sistema attuale.

Quandu unipochi si sò interrugati nantu à l'opportunità di fà un ricorsu contr'à a decisione di u prefettu, eiu aghju sustinutu davanti à a vostra assemblea chì ci vulia à fallu stu ricorsu, puru sapendu chì à a fine seria un ricusu da a parte di a ghjuridizione amministrativa.

Ciò ch'è accadutu ùn ci hà micca surpresu. Ma pensu ch'emu fattu a dimostrazione, forte, chì u quattru custizionale attuale ùn permette micca un veru statutu di a lingua, ch'ella sia in a vita di tutti i ghjorni, ch'ella sia per l'accessu à l'impieg, o ch'ella sia in u sistema educativu.

È per raportu à a situazione attuale, ci hè attempu sta decisione di u Cunsigliu di Statu è a dichjarazione di un ripresentante sindacale. Eiu vogliu di chì, di sicuru, in st'affare cum'è in tutti, hè normale ch'ind'una demucrazia, si possinu sprime tutte l'opinione, puru opinione chì sò tutt'à fattu cuntrarie à ciò ch'è no pensemu. Ci vole chì u dibattitu democraticu permetti di decide sò ch'ellu vole u populu. È sò ch'ellu vole u populu oghje, in Corsica, l'hà detta di manera chjara, puru attraversu voti unanimi di l'Assemblea di Corsica, ghjè chì a lingua cora sia ufficiale, ch'ellu ci sia in tutti i duminii di a sucetà un usu cunsacratu di a lingua à paru incù u francese.

Ci hà da vulè urganizà quessa, ci vole à falla prestu, pensu chì ùn ci vole micca ch'ella sia solu l'affare di u Cunsigliu esecutivu, perchè pensu chì a lingua hè l'affare di tutti. L'emu dimostrata attraversu e nostre mubilizzazione, a nostra lotta è i nostri voti. Hè per quessa chì, cù a Presidente di l'Assemblea, v'avemu prupostu, a sapete, di spiazza ver di l'Assemblea di Corsica, l'ultima fasa, attempu di a furmalizzazione di a nostra visione di a revisione custituzionale, a nostra visione di u statutu di a lingua in a lege organica à vene, è a nostra visione di a piazza di a lingua in u sistema educativu perchè a sapete, avemu a furtuna d'avè un rettore oghje, chjamatu in a stampa « rettore di a lingua » è face assai, ma cum'è a l'aghju detta, è a sà, s'ellu si ne vada è ch'ellu ne vene un antru, ùn emu accatastatu nulla.

Què què hè un primu affare.

U secondu affare, l'aghju da dì à alta voce, ancu s'è ùn vogliu dà gattive idée à quelli chì ci stanu à sente, ma forse quelli chì ci stanu à sente è chì pudarianu avè 'sse idee ùn parlanu micca u corsu è ùn lu capiscenu micca, ùn lu volenu parlà ne imparà ! Ma l'aghju da dì quantunque : puru cun tutta a vulintà è i sforzi di u rettore, dumanu, s'ellu ci hè un ricorsu ghjuridicu, per di chì u bislinguismu è moltu più l'immersione, sò facultativi, vince ind'u quattru attuale. È a nostra visione serà rimessa in causa. Dunque ci vole una sicurizzazione ghjuridica di a piazza di a lingua corsa in l'insignamentu. Di tuttu què n'emu da parlà è emu da prupone a nostra visione, spergu scumpartuta.

Terzu è ultimu puntu : vulemu passà da una pulitica di a lingua à una pulitica linguistica, cum'è l'emu detta. Hè tempu è ora. Emu u raportu di prefigurazione di l'orientazione ch'è statu rimessu, emu u travagliu rimarchevule ch'è statu fattu da a Cummissione di a cultura, da Muriel è da tutti quelli chì si sò impignati, aghju scuntratu st'ultime simane, parecchi attori di a lingua frà i quali i cullettivi Parlemu corsu è Femula campà.

Aspettanu tutti l'attori chì l'Assemblea di Corsica è u Cunsigliu esecutivu fianu di a lingua una priurità assoluta in e simane à vene è vi prupuneraghju, cù a presidente, dopu meziornu, ch'è no ne fiamu una priurità assoluta è cuncreta.